

新 中 學 文 庫

選 詩 宋

下 冊

陳 幼 璞 選 註

商 務 印 書 館 發 行

中學國文補充讀本

第一集

選 詩 宋

下 冊

陳幼璞選註

商務印書館發行

中華民國二十六年五月初版
中華民國三十七年七月三版

(83031)

中學國文補充
讀本第一集 宋 詩 選 三 冊

每部定價國幣肆元

印刷地點外另加運費

版權所必
翻印必究

選註者 陳 幼 璞

發行人 朱 經 農

上海河南中路

印刷所 商務印書館

發行所 商務印書館

各地

(本書校對者 沈抱秋 王文治 謝雨東 黃 堅)

秋日登海州乘槎亭

張耒

海上西風八月涼，乘槎亭外水茫茫。人家日暖樵漁樂，山路秋晴松柏香。隔水飛來鴻陣闊，趁潮歸去櫓聲忙。蓬萊方丈知何處？煙浪參差在夕陽。

夜泊寧陵

韓駒

汴水日馳三百里，扁舟東下便開帆。旦辭杞國風微北，夜泊寧陵月政南。老樹挾霜鳴窅窅，寒花垂露落毵毵。茫然不悟身何處，水色天光共蔚藍。

寧陵卽今河南寧陵縣。

次韻南溪觀魚

韓駒

城西鼓楫又城東，不待溪分上下風。碧樹垂楊間黃綠，冰盤行餚簇青紅。橫

塘日暮林巒合，斷岸秋來浦溆通。安得此身無世累，便隨漁艇入空濛。

魚溝懷家

晁補之

生涯身事任東西，藥笥書囊偶自贍。柳嫩桑柔鴉欲乳，雪消冰動麥初齊。沙頭晚日檣竿直，淮上春風雁鷺低。歸去未應芳物老，桃花如錦遍松溪。

山行寄程帥

陳造

雨餘支徑濕平沙，恰稱卑官下澤車。雜樹暝煙森立槩，亂峯迎客儼排衙。水禽時弄翩躚影，野草爭開細碎花。久憶山行如此願，不應回首更思家。

下澤短轂車也；周禮：「車人爲車，行澤者欲短轂，行山者欲長轂。」

舟過荻塘

沈與求

野航春入荻芽塘，遠意相傳接渺茫。落日一篙桃葉浪，薰風十里藕花香。河回遽失青山曲，菱老難容碧草芳。村北村南歌自答，懸知歲事到金穰。

金穰不實豐盛也。

宿山館四首（錄一）

徐積

龍歸潭面千尋黑，虎視林隈兩炬燈。執爨正燃炊飯火，乞食恰值寄眠僧。倦聽雨後諸巖溜，渴憶春前一片冰。臥看滿山紅日曉，碧瑤城闕鬱千層。

雨晴

陳與義

天缺西南江面清，纖雲不動小灘橫。牆頭語鵲衣猶濕，樓外殘雷氣未平。盡取微涼供穩睡，急搜奇句報新晴。今宵勝絕無人共，臥看星河盡意明。

登岳陽樓二首（錄一）

陳與義

洞庭之東江水西，簾旌不動夕陽遲。登臨吳蜀橫分地，徙倚湖山欲暮時。萬里來遊還望遠，三年多難更凭危。白頭弔古霜風裏，老木蒼波無限悲。

寄小兒

李覲

兩世煢煢各一人，生來且喜富精神。欲教齟齬從師學，祇恐文章誤爾身。但有犁鋤終得飽，莫看紈綺便嫌貧。不知別後啼多少，若問家僮說未真。

臞菴浮天閣

孫覲

黃蘆吹雪滿汀洲，萬里煙波接素秋。數點征帆天上落，一輪斜日水中流。長橋踏月隨幽伴，小閣浮天賦遠遊。便買一舟爲泛宅，此生何必老「菟裘」。

菟裘地名；左傳：「使營菟裘，吾將老焉。」後因謂致仕退居之所爲菟裘。

行舟憶永和兄弟

周必大

一挂吳帆不計程，幾回繫纜幾回行！天寒有日雲猶凍，江闊無風浪自生。數點家山常在眼，一聲寒雁正關情。長年忽得南來鯉，恐有音書作急烹。

周必大，字子充，廬陵人。第進士，累官樞密使、右丞相。寧宗初，以少傅致仕。詩格澹雅，有省齋集。

夢山中故人

朱熹

風雨蕭蕭已送愁，不堪懷抱更離憂。故人只在千巖裏，桂樹無端一夜秋。把袖追歡勞夢寐，舉杯相屬暫綢繆。覺來卻是天涯客，簷響潺潺瀉未休。

二月三日登樓有懷金陵宣城諸友

范成大

百尺西樓十二欄，日遲花影對人閒。春風已入片時夢，寒食從今數日間。折柳故情都望斷，落梅新曲與誰關？詩成欲訪江南便，千里煙波萬疊山。

折柳贈別之辭也，漢人送客至灞橋，折柳贈別，故折柳遂用爲贈別語；又，折楊柳漢橫吹曲名。

暮春上塘道中

范成大

客舍無煙野水寒，競船人醉鼓闌珊。石門柳絮清明市，洞口桃花上巳山。飛絮著人春共老，片雲將夢晚俱還。明朝遮入長安道，慚愧江湖釣手閒。

雪霽獨登南樓

范成大

雪晴風勁晚來冰，樓上奇寒病骨驚。雀啄空簷銀筍墮，鴉翻高樹玉塵傾。青帘閃閃千家靜，黃帽亭亭一水橫。坐久天容卻溫麗，一彎新月對長庚。

銀筍簷滴凍結，其狀如筍，故謂之銀筍。玉塵雪也。

早發竹下

范成大

結束晨粧破小寒，跨鞍聊得散疲頑。行衝薄薄輕輕霧，看放重重疊疊山。碧穗炊煙當樹直，綠紋溪水趁橋灣。清禽百轉似吟客，正在有情無思間。

湘江舟尾快風挂帆

范成大

船頭雪浪吼奔雷，十丈高帆滿意開。我自只憑忠信力，風應不爲世情來。兒童屢惜峰巒過，將士猶教鼓角催。明日祝融天柱去，更煩先捲亂雲堆。

祝融、天柱皆山名。

水鄉酌別但能之主管能之將過石康

范成大

南郭河橋市井喧，綠荷香處有江天。一簾梅雨鱸煙外，三疊陽關燭淚前。馬

耳西山君並海，船頭北渚我歸田。後期直恐參商似，且醉金槽四十絃。

參商二星名，二星相背而出，永不相見，故喻相離爲參商。

畫工季友直爲余作「冰天」「桂海」二圖「冰天」畫使北虜渡

黃河時「桂海」畫佛子遊巖道中也戲題 范成大

許國無功浪着鞭，天教飽識漢山川。酒邊巒舞花低帽，夢裏胡笳雪沒韉。收拾桑榆身老矣，追隨萍梗意茫然。明朝重上歸田奏，更放岷山萬里船。

桑榆日落之時，其光尙留於桑榆之上，喻晚年也。

步入衡山

范成大

應有人家住隔溪，綠陰亭午但聞雞。松根當路龍筋瘦，竹筍滿山鳳尾齊。墨染安雲猶似瘴，絲來小雨不成泥。更無騎吹喧相逐，散誕閒身信馬蹄。

鄂州南樓

范成大

誰將玉笛弄中秋？黃鶴飛來識舊遊。
漢樹有情橫北渚，蜀江無語抱南樓。
燭天燈火三更市，搖月旌旗萬里舟。
卻笑鱸江垂釣手，武昌魚好便淹留。

黃鶴今湖北武昌有黃鶴樓；寰宇記云：「昔費文禕登仙，每乘黃鶴於此憩駕，故名。」南樓在武昌。鱸江垂釣手成大自稱也；晉張翰因秋風起思吳中鱸魚膾，成大吳郡人，故自稱如此。

初歸石湖

范成大

曉霧朝暾紺碧烘，橫塘西岸越城東。
行人半出稻花上，宿鷺孤明菱葉中。
信脚自能知舊路，驚心時復認鄰翁。
當時手種斜橋柳，無限鳴蜩翠掃空。

石湖在今江蘇吳縣西南，成大結廬其間。

新夏感事

陸游

百花過盡綠陰成，漠漠爐香睡晚晴。
病起兼旬疏把酒，山深四月始聞鶯。
近傳下詔通言路，已卜餘生見太平。
聖主不忘初政美，小儒惟有涕縱橫。

聞武均州報已復西京

陸游

白髮將軍亦壯哉，西京昨夜捷書來。
胡兒敢作千年計，天意甯知一日回。
列聖仁恩深雨露，中興赦令疾風雷。
懸知寒食朝陵使，驛路梨花處處開。

送七兄赴揚州帥幕

陸游

初報邊烽照石頭，旋聞胡馬集瓜州。
諸公誰聽芻蕘策，吾輩空懷畎畝憂。
急雪打窗心共碎，危樓望遠涕俱流。
豈知今日淮南路，亂絮飛花送客舟？

瓜州地名亦作瓜洲在今江蘇江都南江濱

望江道中

陸游

吾道非邪來曠野，江濤如此去何知！起隨烏鵲初翻後，宿及牛羊欲下時。風力漸添帆力健，舳舻常雜雁聲悲。晚來又入淮南路，紅樹青山合有詩。

遊山西村

陸游

莫笑農家臘酒渾，豐年留客足雞豚。山重水複疑無路，柳暗花明又一村。簫鼓追隨春社近，衣冠簡樸古風存。從今若許閑乘月，拄杖無時夜叩門。

塔子磯

陸游

塔子磯前艇子橫，一窗秋月爲誰明？青山不減年年恨，白髮無端日日生。

澤蒼茫非故國，九歌哀怨有遺聲。古來撥亂非無策，夜半潮平意未平！

七澤，司馬相如賦云：「臣聞楚有七澤……嘗見其一，名曰雲夢。」雲夢澤今已爲邑聚村落，其地當湖北安陸縣南。九歌，卽楚辭，九歌相傳爲屈原所作。撥亂，謂撥亂反正也，治亂世使復正道。

柳林酒家小樓

陸游

桃花如燒酒如油，緩轡郊原當出遊。微倦放教成午夢，宿醒留得伴春愁。遠途始悟乾坤大，晚節偏驚歲月遒。記取清明果州路，半天高柳小青樓。

嘉川鋪得檄遂行中夜次小柏

陸游

黃旗傳檄趣歸程，急服單裝破夜行。肅肅霜飛當十月，離離斗轉欲三更。酒消頓覺衣裘薄，驛近先看炬火迎。渭水函關尤不遠，著鞭無日涕空橫。

渭水卽陝西渭河。

函谷函谷關。

歸次漢中境上

陸游

雲棧屏山閱月遊，馬蹄初喜蹋梁州；地連秦雍川原壯，水下荊揚日夜流。遺虜孱孱甯遠略，孤臣耿耿獨私憂。良時恐作他年恨，大散關頭又一秋。

大散關卽散關，在陝西寶雞縣西南，因置關大散嶺下，故名。

書事

陸游

生長江湖狎釣船，跨鞍塞上亦前緣。雲埋廢苑呼鷹處，雪暗荒郊射虎天。醪酒芳醇偏易醉，胡羊肥美了無羶。揚州雖有東歸日，閉置車中定悵然。

綿州魏城縣驛有羅江東詩云：「芳草有情皆礙馬，好雲無處不遮樓。」戲用其韻。

陸游

老夫乘興復西遊，遠跨秦吳萬里秋。
尊酒登臨遍山寺，歌辭散落滿江樓。
孤城木葉蕭蕭下，古驛灘聲瀲灩流。
未許詩人誇此地，茂林修竹憶吾州。

茂林修竹語見王羲之蘭亭集序，羲之嘗與孫統、孫綽等修祓禊之禮於會稽山陰之蘭亭，作蘭亭集序以記之；陸游山陰人也，故云。

病起書懷二首（錄一）

陸游

病骨支離紗帽寬，孤臣萬里客江干。
位卑未敢忘憂國，事定猶須待闔棺。
天地神靈扶廟社，京華父老望和鑾。
出師一表通今古，夜半挑燈更細看。

和鑾車鈴也，在軾曰和，在鑾曰鑾。出師表諸葛亮出師北伐時所上疏。

月下醉題

陸游

黃鵠飛鳴未免飢，此身自笑欲何之？
閉門種菜英雄老，彈鋏思魚富貴遲。
生

擬入山隨李廣，死當穿冢近要離。一樽彊醉南樓月，感慨長吟恐過悲。

種菜用劉備事，注見前。

彈鋏思魚國策：「馮驩彈鋏歌曰：長鋏歸來乎，食無魚。」馮驩孟

嘗君客也。

李廣漢武帝時名將，與匈奴大小七十餘戰，然數奇，卒不封侯。

要離春秋時

刺客，爲吳公子光刺慶忌，慶忌義之，使還吳，離至江陵，伏劍以報。

萬里橋江上習射

陸游

坡隴如濤東北傾，胡牀看射及春晴。風和漸減雕弓力，野迥遙聞羽箭聲。天上機槍端可落，草間狐兔不須驚。丈夫未死誰能料，一箭他年下百城。

機槍彗星也。箭箭幹也。

登賞心亭

陸游

蜀棧秦關歲月遒，今年乘興卻東遊。全家穩下黃牛峽，半醉來尋白鷺洲。黯

黯江雲瓜步雨，蕭蕭木葉石城秋。孤臣老抱憂時意，欲請遷都涕已流。

黃牛峽在湖北宜昌縣重巖疊起最高處如人負刀牽牛狀。白鷺洲在江蘇江寧縣西南

大江中。

夜步庭下有感

陸游

夜遶庭中百匝行，秋風傳漏忽三更。星晨北拱疏還密，河漢西流縱復橫；驚鵲遶枝棲不穩，冷螢穿竹遠猶明。書生老抱平戎志，有淚如江未敢傾。

書憤

陸游

早歲那知世事艱？中原北望氣如山。樓船夜雪瓜洲渡，鐵馬秋風大散關；塞上長城空自許，鏡中衰鬢已先斑。出師一表真名世，千載誰堪伯仲間。

題齋壁四首（錄一）

陸游

稽山千載翠依然，著我山前一釣船。瓜蔓水平芳草岸，魚鱗雲襯夕陽天。出從父老觀秧馬，歸伴兒童放紙鳶。君看此翁閑適處，不應便謂世無仙。

[△]稽山即會稽山，在今浙江紹興縣東南十三里。

安流亭俟客不至獨坐成詠

陸游

憶昔西征鬢未霜，拾遺陳迹吊微茫。蜀江春水千帆落，禹廟空山百草香。馬影斜陽經劍閣，鶻聲清曉下瞿塘。酒徒雲散無消息，水榭憑欄淚數行。

[△]拾遺官名，謂杜甫也，甫嘗爲拾遺。

送霍監丞出守盱眙

陸游

淮浦鱗鱗浸碧天，卽今誰料作窮邊？空聞甌脫嘶胡馬，不見浮屠插霽煙。亭障久安無檄到，孟觴頻舉有詩傳。長城萬里英雄事，應笑窮儒飽畫眠。

甌脫本義爲邊境斥堠之室，後沿用以指邊境之棄地。亭障塞上險要處築牆置亭，使人守之，謂之亭障。

冬夜讀書忽聞雞唱

陸游

齷齪常談笑老生，丈夫失意合躬耕。天涯懷友月千里，燈下讀書雞一鳴。事去大牀空獨臥，時來豎子或成名。春蕪何限英雄骨，白髮蕭蕭未用驚。

題陽關圖

陸游

誰畫陽關贈別詩？腸如在渭橋時。荒城孤驛夢千里，遠水斜陽天四垂。青史功名常蹭蹬，白頭襟抱足乖離。山河未復胡塵暗，一寸孤愁祇自知。

陽關贈別詩卽陽關三疊曲。

枕上偶成

陸游

放臣不復望修門，身寄江頭黃葉村。酒渴喜聞疏雨滴，夢回愁對一燈昏。河
潼形勝甯終棄，周漢規模要細論。自憾不如雲際雁，南來猶得過中原。

河潼黃河與潼關也。

泊馬公嶺

徐璣

維舟拂曉步平沙，晚泊雲根第一家。新取菜蔬沾野露，旋編籬落帶山花。門
前相對青蜂小，屋後流來白水斜。可愛山翁無一事，藤牆西畔看蜂衙。

四月卽景

戴昺

茶歌纔了又田歌，節物真成一鳥過。
蒼竹颭風涼意足，碧梧留雨夜聲多。
瓜緣茅屋抽長蔓，藕過蔬畦出矮荷。
最喜白鷗相狎久，對人自在浴清波。

金陵驛

文天祥

草舍離宮轉夕暉，孤雲飄泊復何依！
山河風景元無異，城郭人民半已非。
滿地蘆花和我老，舊家燕子傍誰飛！
從今別卻江南日，化作杜鵑帶血歸！

文天祥字宋瑞，號文山，吉水人。理宗時進士，官至江西安撫使。元兵入寇，天祥應詔勤王，受命使元軍，被執，至鎮江，夜亡入真州。時瑞宗立於福州，拜天祥右相，封相國。公募兵轉戰，力圖恢復，兵敗，被執不屈，作正氣歌以見志，遂就死。

送謝疊山先生北行

汪元量

滿懷忠孝有天知，不管人間事已非。
萬里乾坤雙草履，百年身世一麻衣。
行

藏自信牀頭易，臥病惟餐隴首薇。倘過宗周見禾黍，幾多新淚灑殘暉！

謝疊山謝枋得號疊山。

宗周謂西周也。

禾黍詩有黍離篇，小序云：「閔宗周也，周大夫

行役，至於宗周，過故宗廟宮室，盡爲禾黍，閔周室之顛覆，徬徨不忍去，而作是詩。」

五古

田家語

梅堯臣

庚辰詔書：「凡民三丁籍一，立校與長，號弓箭手，用備不虞。」主司欲以多媚上，急責郡吏，畏不敢辨，遂以屬縣令，互搜民口，雖老幼不得免。上下愁怨，天雨淫淫……因錄田家之言，次爲文，以俟採詩者云。

「誰道田家樂？春稅秋未足；里胥扣我門，日夕苦煎促。盛夏流潦多，白水高於屋，水既害我菽，蝗又食我粟。前月詔書來，生齒復板錄，三丁籍一壯，惡使操弓韜。州符今又嚴，老吏持鞭朴，搜索稚與艾，唯存跛無目。田闔敢怨嗟？父子各悲哭。南畝焉可事？買箭賣牛犢。愁氣變久雨，鐙缶空無粥。盲跛不能耕，死亡在遲速。」

我聞誠所慙，徒爾叨君祿；却詠歸去來，刈薪向深谷。

韞弓衣也。

艾，美好也；孟子：「知好色則慕少艾。」

歸去來，即歸去辭，晉陶潛作。

汝墳貧女

梅堯臣

時再點弓手，老幼俱集，大雨甚寒，道死者百餘人，自壞河至昆陽，老牛陂僵尸相藉。

汝墳貧家女，行哭音悽愴，自言有老父：「孤獨無丁壯，郡吏來何暴！縣官不敢抗，督遣無稽留，龍鍾去携杖，勤勤囑四隣，幸願相依傍。」

「適聞閭里歸，問訊疑猶強，果然寒雨中，僵死壤河上，弱質無以託，橫尸無以葬。生女不如男，雖存何所當？拊膺呼蒼天，生死將奈向！」

汝墳，水名，墳，大防也；詩：「遵彼汝墳。」龍鍾，衰憊之狀也。

月夜

孔平仲

生平最好月，況此秋夜闌？長風送蕩漾，浩露洗團團。仰頭視虛空，光彩如可

餐星辰斂芒角，河漢收波瀾，更無微雲翳，挂此白玉盤；六合靜皎皎，萬木涼珊珊。爲爾廢昏臥，裴回更漏殘。

更登高處望，歷歷見湖山。爽氣集冰雪，清心生羽翰，便欲御泠然，因之遊廣寒，一臨天池水，沐浴隨飛仙。

御泠然，莊子：「列子御風而行，泠然善也。」

曹亭獨燈

孔平仲

問我當何之？曹亭蒼木外。江湖水方漲，曠闊吾所愛；微風撼晚色，爽氣回秋籟；楊柳隱官隄，芙蕖接公廨；白雲依山起，點綴若圖繪。何須招遊客，清興自無輩。落日更憑欄，下看飛鳥背。

收家書

孔平仲

早承會稽信，晚接清江使。兩地千里餘，尺書同日至。既知骨肉安，復得鄰里事。丁寧問兒女，委瑣及奴婢。開包視封題，親故各有寄。牛狸與黃雀，路遠不易致。東人罕曾識，專享無所遺。豈徒抵萬金，鼓腹快異味。

△△△
抵萬金杜甫詩：「家書抵萬金。」

出城

孔平仲

駐馬河之西，送車皆已返。郊原人漸少，風物秋將晚。身如獨鳥輕，意與青山遠。

代小子廣孫寄翁翁

孔平仲

爹爹來密州，再歲得兩子。牙兒秀且厚，鄭鄭已生齒。翁翁尙未見，既見想歡喜。廣孫讀書多，寫字輒兩紙。三三足精神，大安能步履。翁翁雖舊識，伎倆非昔比。

何時得團聚，盡使羅拜跪？

婆婆到輦下，翁翁在省裏；大婆八十五，寢膳近何似？爹爹與妳妳，無日不思爾。每到時節佳，或對飲食美，一一俱上心，歸期當屈指。昨日又開爐，連天北風起，飲闌却蕭條，舉目數千里。

禿山

王安石

吏役滄海上，瞻山一停舟。怪此禿誰使，鄉人語其由：「一狙山上鳴，一狙從之遊，相匹乃生子，子衆孫還稠。山中草木盛，根實始易求，攀挽上極高，屈指亦窮幽；衆狙各豐肥，山乃盡侵牟。攘爭取一飽，豈暇議藏收？大狙尙自苦，小狙亦已愁，稍稍受咋噉，一毛不得留。」

狙雖巧過人，不善操鋤耰，所嗜在果穀，得之常以偷。嗟此海山中，四顧無所投，生生未云已，歲晚將安謀？

至下馬磧憩於北山僧舍有閣曰懷賢南直斜谷西臨五丈

原諸葛孔明所從出師也

蘇軾

南望斜谷口，三山如犬牙；西觀五丈原，鬱屈如長蛇；有懷諸葛公，萬騎出漢巴。吏士寂如水，蕭蕭聞馬槌。公才與曹丕，豈止十倍加？顧瞻三輔間，勢若風卷沙。一朝長星墜，竟使蜀婦髻！

山僧豈知此？一室老烟霞。往事逐雲散，故山依渭斜；客來空弔古，清淚落悲笳。

槌，筆也，所以鞭馬者。

公才與曹丕豈止十倍加？劉先主臨終謂諸葛亮曰：「君才十倍曹

丕，必能安國，終定大事……」

三輔，漢以京兆左馮翊右扶風爲三輔。

髻，以麻髮合結

曰髻，婦人喪髻也。

送運判朱朝奉入蜀

蘇軾

藹藹青城雲，娟娟峨眉月。隨我西北來，照我光不滅。我在塵土中，白雲呼我歸。我游江湖上，明月濕我衣。岷峨天一方，雲月在我側。謂是山中人，相望了不隔。夢尋西南路，默數短長亭。似聞嘉陵江，跳波吹枕屏。

送君無一物，清江飲君馬。路穿慈竹林，父老拜馬下。不用驚走藏，使者我友生。聽訟如家人，細說爲汝評。若逢山中友，問我歸何日。爲話腰腳輕，猶堪踏泉石。

白雲呼我歸，
軾蜀人，故云。

和子由記園中草木四首（錄二）

蘇軾

（一）

荒園無數畝，草木動成林。春陽一已敷，妍醜各自矜。蒲萄雖滿架，困倒不能

任可憐病石榴，花如破紅襟；
葵花雖粲粲，蒂淺不勝簪；
叢蓼晚可喜，輕紅隨秋深。
物生感時節，此理等廢興，
飄零不自由，盛亦非汝能。

(二)

我歸自南山，山翠猶在目，
心隨白雲去，夢繞山之麓。
汝從何方來？笑齒粲如玉；
探懷出新詩，秀語奪山綠。
覺來已茫昧，但記說秋菊；
有如採樵子，入洞聽琴筑。
歸來寫遺聲，猶勝人間齒。

杜沂遊武昌以酴醾花見餉

蘇軾

酴醾不爭春，寂寞開最晚。
青蛟走玉骨，羽蓋蒙珠幘，
不粧艷已絕，無風香自遠。

淒涼吳宮闕，紅粉理故苑，
至今微月夜，笙歌來絕巘。
餘妍如此花，千載尙清婉。
怪君呼不歸，定爲花所挽，
昨宵雷雨惡，花盡君應返。

日影滿松牕，雲開雨初止。晴林梨棗熟，曉港兒童喜。牛羊深澗下，鳬鴈寒塘裏。田父酒新成，餅罌饋鄰里。

題竹石牧牛

黃庭堅

野次小崢嶸，幽篁相依綠。阿童三尺筆，御此老穀觶。石吾甚愛之，勿遣牛礪角。牛礪角尚可，牛鬪殘我竹。

穀觶[△]恐懼貌，謂牛也；孟子：「吾不忍是穀觶。」

廣化遇雨

張耒

浮雲蔽高峰，臺殿延晚色。風聲轉谷豪，雨脚射山白。東樓瞰虛明，龍甲排檜栢。蕭森異人境，坐視動神魄。撞鐘寺門掩，晚霽尙殘滴。相携下山去，塵靜馬無迹。歸來解鞍歇，新月如破壁。但恐桃花源，回舟已青壁。

西華道中

張耒

我行陳許郊，十里平若掌。居民雜荆榛，耕少地多曠。野兔作跳奔，驚鳶或高颺。喬林多疾風，寒澗有餘漲。棘籬蔽茅屋，鷄犬入村巷。

主人掃土場，秣馬具朝餉。童兒汲土井，敗飯堆瓦盎。忽悲爲生陋，自足無他望。嗟余走薄官，奔走年將壯。長抱羈旅愁，何時稅歸鞅？

稅歸鞅猶言歸里稅解也，鞅馬頸革，所以負輓者。

題采菊圖

韓駒

黃菊有何好？且寄平生懷。遇酒興不淺，無酒意亦佳。此理誰復明？自昔寡所諧。空餘采菊圖，寂寞懸高齋。

今日菊始華，叢鴈鳴相和。若無一觴酒，如此重九何？悠然數酌盡，會心豈在

多？醒來不復記，散髮東山阿。

上馬

晁補之

上馬笑屬君：「歸期在十日。」來時草白芽，歸時青鬱鬱，來嗔馬蹄急，歸嗔馬蹄緩；人心自如此，馬蹄終不變。

詠路

鄒浩

赤路如龍蛇，不知幾千丈？出沒山水間，一下復一上。伊予獨何爲？與之同俯仰。

雁從何處來

徐積

雁從何處來？正望東南飛。毛間認白露，肚下看殘暉；浮雲共煙水，日夜爲所

依。衡陽是故山，但恐故人稀。

衡陽是故山，衡陽有回雁峯，相傳雁至衡陽不過，遇春而同，唐宋以來，詩人遂以爲故實。

課書

張九成

汲汲我何事？愛此牕日光。北門終日開，風透軒檻涼。貧病何以療？六經眞古方。榮辱頓爾失，太山亦毫芒。呼兒來讀書，絃誦驚滿堂。仕途有捷徑，掩口笑我狂。

張九成字子韶，開封人。紹興二年進士，累官至刑部侍郎。性好禪悅，詩亦多空悟習氣。

南溪

劉子翬

聊爲溪上遊，一步一回顧。悠悠出山水，浩浩無停注。惟有舊溪聲，萬古流不去。

九月三日宿胥口始聞雁

范成大

故人久不見，乍見雜悲喜。新雁如故人，一聲驚我起。把酒不能觴，送目問行李。曾云行路難，「空濛千萬里。塞北多關山，江南渺雲水。」風高吹汝瘦，旅伴今餘幾！斜行不少駐，滅沒蒼煙裏。

羈遊吾亦倦，客程殊未已。扁舟費年華，短纜繫沙尾。物性各有役，冥心聽行止。江郊匝地熱，塲圃平如砥。歸期且勿念，共飽豐年米。

行李古謂行人爲行李，此猶言行程。

題嶽麓道卿臺

范成大

山外江水黃，江外滿城綠。城外杳無際，天低到平陸。長煙貫楚尾，遠勢帶吳蜀。故園東北望，遊子闌干曲。

嶽麓山名，在湖南長沙縣西，衡山北麓也。

夜讀兵書

陸游

孤燈耿霜夕，窮山看兵書。平生萬里心，執戈王前驅；戰死士所有，恥復守妻孥。成功亦邂逅，逆料政自疎。陂澤號飢鴻，歲月期貧儒。歎息鏡中面，安得長膚腴！

執戈王前驅，謂身先戰陣也。邂逅偶然。

寶劍吟

陸游

幽人枕寶劍，殷殷夜有聲。人言劍化龍，直恐興風霆，不然憤狂胡，慨然思遐征。取酒起酌劍，至寶當潛形。豈無知君者？時來自施行。一匣有餘地，胡爲鳴不平。

酌以酒祭地也。

避暑江上

陸游

苦熱厭城市，初夜臨江湍。風從西山來，頗帶積雪寒。堰聲靜尤壯，噴薄如急灘。頓遠車馬喧，更覺衣裳單。斷岸吐缺月，恨不三更看。且隨螢火歸，城扉欲橫關。

噴薄水相激盪也。

登太平塔

陸游

我從平地來，忽寄百尺巔。眼力與脚力，初不減少年。漸高山愈出，杳杳浮雲煙。舉手捫參旗，日月磨螳旋。天風忽吹衣，便欲從此仙。且復下梯去，著書未終篇。

參旗星名。

書悲二首

陸游

(一)

今日我復悲，堅臥腳踏壁，古來共一死，何至爾寂寂？秋風兩京道，上有胡馬跡，和我壯士廢，憂國清淚滴！關河入指顧，忠義勇推激，常恐埋山邱，不得委鋒鏑。立功老無期，建議賤非職，賴有墨成池，淋漓豁胸臆。

(二)

丈夫孰能窮？吐氣成虹霓。釀酒東海乾，累麴南山齊。平生搴旗手，頭白歸扶犁。誰知蓬窗夢，中有鐵馬嘶？何當受詔出，函谷封丸泥；築成天山北，開府蕭關西；萬里掃塵煙，三邊無鼓鼙。此意恐不遂，月明號荒雞。

^{△△}搴旗搴，取也，取敵旗也；[△]李陵答蘇武書：「然猶斬將搴旗，追奔逐北。」

^{△△△△}函谷封丸泥，^{△△}隗囂

將王元說隗囂曰：「元請以丸泥爲大王東封函谷關。」

夏夜舟中聞水鳥聲甚哀，若曰「姑惡」，感而作詩

陸游

女生藏深閨，未省窺牆藩。上車移所天，父母爲它門。

「妾身雖甚愚，亦知君姑尊。下牀頭雞鳴，梳髻著襦裙，堂上奉洒掃，廚中具盤飧，青青摘葵莧，恨不美熊蹯。姑色少不怡，衣袂濕淚痕。所冀妾生男，庶幾姑弄孫！此志竟蹉跎，薄命來讒言，放棄不敢怨，所悲孤大恩。」

古路傍陂澤，微雨鬼火昏。君聽姑惡聲，無乃遣婦魂！

移所天出嫁至夫家也，所天謂夫也。君姑婦稱夫之母曰姑，亦曰君姑。

雪夜作

陸游

雪重從壓竹，竹折有奇聲。雪聲亦莫掃，小窗終夜明。我老尙耐冬，開卷對短檠。龍茶與羔酒，得失不足評。但思被重鎧，夜入蔡州城。君勿輕癯儒，有志事竟成。

夜入蔡州城唐李愬將兵討淮西，雪衣入蔡州，淮西平。

農家歎

陸游

有山皆種麥，有水皆種稻，牛領瘡見骨，叱叱猶夜耕；竭力事本業，所願樂太平。

門前誰剝啄？縣吏徵租聲；一身入縣庭，日夜窮笞荆。人孰不憚死？自計無由生。還家欲具說，恐傷父母情；老人倘得食，妻子鴻毛輕！

剝啄叩門聲也，故叩門亦謂之剝啄。

牧牛兒

陸游

溪深不須憂，吳牛自能浮；童兒踏牛背，安穩如乘舟。寒雨山陂遠，參差煙樹晚；聞笛翁出迎，兒歸牛入圈。

一雨二十日

陸游

一雨二十日，雨意殊未闌，我廬大澤中，四顧煙水寬。東家有小舟，借我不作難，鸕鷀與鷓鴣，自是平生歡。更作十日期，水淺生小灘，相與極幽賞，勿待江月殘。

人日詰朝從昌英叔出謁

楊萬里

四序各自佳，要不如春時，何必花與柳，始愛春物熙。今晨駕言出，從公南山西。泥軟屨自愜，風嫩面不知，寒草動暖芽，晴山餘雨姿。水日亦相媚，蹙紋生碎暉。鳥聲豈爲我？我聽偶自怡。

出門初憚煩，載塗乃忘歸。但令我意適，豈笑出處爲？路人見我揖，屬我有所思，我不見其面，信口聊應之。徐語恐忤物，欲謝已莫追。我率或似傲，彼慍獨得辭。

人日詰朝謂人日後一日也，陰曆正月七日謂之人日，詰朝，明朝也。

妾命薄

徐 照

初與君相知，便欲肺腸傾，只擬君肺腸，與妾相似生。徘徊幾言笑，始悟非真情，妾情不可收，悔思淚盈盈！

大熱五首（錄二）

戴復古

（一）

天地一大窖，陽炭烹六月，萬物此陶鎔，人何怨炎熱？君看百穀秋，亦自暑中結。田水沸如湯，背汗濕如潑，農夫方夏耘，安坐吾敢食？

（二）

天嗔吾面白，晒作鐵色深，天能黑我面，豈能黑我心？我心有冰雪，不受暑氣侵。推去北窗枕，思鼓南風琴，千古叫虞舜，遺我以好音。

南風琴尸子：「帝舜彈五絃之琴，以歌南風，其辭曰：南風之薰兮，可以解吾民之愠兮；南風之時兮，可以阜吾民之財兮。」

頻酌淮河水

戴復古

有客游濠梁，頻酌淮河水。東南水多鹹，不如此水美。春風吹綠波，鬱鬱中原氣，莫向北岸汲，中有英雄淚！

濠梁莊子「莊子與惠子遊於濠梁之上。」注：「濠水名，在淮南鍾離郡石絕水爲梁。」按鍾離故城在今安徽鳳陽縣。

山

戴復古

羣山勢如奔，欲渡長江去。孤峰拔地起，毅然能遏住。屹立大江干，仍能障狂瀾。人不知此山，有功天地間。

正氣歌

文天祥

天地有正氣，雜然賦流形。下則爲河嶽，上則爲日星。於人曰浩然，沛乎塞蒼冥。皇路當清夷，含和吐明庭。時窮節乃見，一一垂丹青。

在齊太史簡，在晉董狐筆。在秦張良椎，在漢蘇武節。爲嚴將軍頭，爲嵇侍中血。爲張睢陽齒，爲顏常山舌。或爲遼東帽，清操厲冰雪。或爲出師表，鬼神泣壯烈。或爲渡江楫，慷慨吞胡羯。或爲擊賊笏，逆豎頭破裂。

是氣所磅礴，凜烈萬古存。當其貫日月，生死安足論。地維賴以立，天柱賴以尊。三綱實繫命，道義爲之根。

嗟予遘陽九，隸也實不力。楚囚纓其冠，傳車送窮北。鼎鑊甘如飴，求之不可得。陰房闐鬼火，春院闔天黑。牛驥同一皁，雞棲鳳凰食。一朝蒙霧露，分作溝中瘠。如此再寒暑，百沴自辟易。

哀哉沮洳場，爲我安樂國！豈有他繆巧？陰陽不能賊。顧此耿耿在，仰視浮雲白。悠悠我心憂，蒼天曷有極！哲人日已遠，典型在夙昔。風櫺展書讀，古道照顏色。

太史簡崔杼既殺齊莊公，齊太史書曰：「崔杼弑其君。」崔子殺之，其弟復書而死者二人，南史聞之，執簡以往。事見左傳。董狐筆，董狐係春秋晉史官，書「趙盾殺其君」者，嚴

將軍頭嚴顏爲蜀劉璋守巴郡，被張飛所擒，不屈，曰：「但有斷頭將軍，無降將軍。」嵇侍

中血嵇紹仕晉官至侍中，八王亂時，紹以身衛惠帝，被殺，血濺帝衣，待事定，帝左右欲爲帝浣衣，帝曰：「此嵇侍中血，勿浣。」張睢陽，唐南陽人，安祿山反，與許遠守睢陽，城

破被擒，罵賊不屈，口齒俱裂。顏常山，舌顏杲卿字昕之，唐臨沂人，爲常山太守，起兵討安

祿山，爲祿山所執，罵賊，舌被鉤斷而死。遼東帽，管甯字幼安，三國魏朱虛人，少與華歆同

學，有乘軒冕過門者，歆往觀之，甯與絕交，漢末避亂居遼東，嘗冠白帽。渡江，楫祖逖字士

雅，曾范陽人，元帝時爲豫州刺史，渡江擊楫，誓曰：「不清中原而復濟者，有如此江。」擊

賊笏，段秀實字成功，唐沂人，德宗時爲司農，朱泚反，秀實唾面大罵，以象笏擊之，中泚額。

地維地之四維也；古人謂地形爲方，故有此語。史記「天柱折，地維缺。」天柱神異經崑崙之山有銅柱焉，其高入天，所謂天柱也，圍三千里，周圍如削。陽九古稱百六陽九爲厄會，蓋謂陽九奇數也，爲陽數之窮，百六偶數也，爲陰數之窮。隸賤者之稱。左傳「士臣阜，阜臣與，與臣隸。」楚囚纓其冠。左傳「晉侯觀於軍府，見鍾儀曰：『南冠而縶者誰也？』」有司對曰：「鄭人所獻楚囚也。」傳車漢書注：「傳者若今之驛，古者以車，謂之傳車。」闕音祕，閉也。牛驥同一皁，鄒陽獄中上梁王書：「使不羈之士，與牛驥同皁；牛驥不肖，驥喻賢人也。沴音麗，妖氣也。辟易退避也。沮洳水浸處下濕地。」

居延

汪元量

憶昔蘇子卿，持節入異域，淹留十九年，風霜毒顏色。嚼氈曾牧羝，跣足步沙磧，日夕思漢君，恨不生羽翼。一朝天氣清，持節入漢國，胤子生別離，回視如堆礫。丈夫抱赤心，安肯淚沾臆？

宋

詩選

一八八

• 居延漢縣名，屬張掖郡，在今甘肅酒泉邊外蒙古額濟納旗。

胤子嗣子也。蘇武在匈奴娶

胡婦，生子，名通國。

七古

越州雲門寺

蘇舜欽

翠嶂環合封白雲，中有蕭寺三爲鄰。老松偃蹇若傲世，飛泉噴薄如避人。蒼猿嘯斷月夜古，丹花開徧陽崖春。盤桓數日不忍去，舟出耶溪猶慘神。

蕭寺三爲鄰，自注：雲門梁武所作，今分爲三寺相連。耶溪卽若耶溪，在今浙江紹興縣南。若耶山下，西施浣紗處也。

田家詞

蘇舜欽

南風霏霏麥花落，豆田漠漠初垂角。山邊夜半一犁雨，田父高歌待收穫。雨多蕭蕭蠶簇寒，蠶婦低眉憂繭單。人生多求復多怨，天公供爾良獨難。

食糟民

歐陽修

田家種糯官釀酒，權利秋毫升與斗。酒沽得錢糟棄物，大屋經年堆欲朽。酒醅漉澆如沸湯，東風來吹酒瓮香。纍纍罌與餅，惟恐不得嘗。官沽味醲村酒薄，日飲官酒誠可樂。

不見田中種糯人，釜無糜粥度冬春？還來就官買糟食，官吏散糟以爲德。嗟彼官吏者，其職稱長民，衣食不蠶耕，所學義與仁，仁當養人義適宜，言可聞達力可施，上不能寬國之利，下不能飽爾之飢。我飲酒，爾食糟，爾雖不我責，我責何由逃？

權官造物專賣曰權。

漉澆水聲。

官沽謂官賣之酒也。

長民長養人民也。

北風吹沙

歐陽修

北風吹沙千里黃，馬行确^{△△}犖悲摧藏。當冬萬物慘顏色，冰雪射日生光茫。一年百日風塵道，安得朱顏長美好？攬鞍鞭馬行勿遲，酒熟花開二月時。

^{△△}确犖言石塊之不平。

春日西湖寄謝法曹歌

歐陽修

西湖春色歸，春水綠於染，羣芳爛不收，東風落如糝。參軍春思亂如雲，白髮題詩愁送春。遙知湖上一樽酒，能憶天涯萬里人。

萬里思春尙有情，忽逢春至客心驚。雪消門外千山綠，花發江邊二月晴。少年把酒逢春色，今日逢春頭已白，異鄉物態與人殊，惟有東風舊相識。

試院聞奚琴作

歐陽修

奚琴本出奚人樂，奚虜彈之雙淚落。抱琴置酒試一彈，曲罷依然不能作。黃

河之水向東流，鳬飛雁下白雲秋。岸上行人舟上客，朝來暮去無今昔。哀絃一奏池上風，忽聞如在河舟中。絃聲千古聽不改，可憐纖手今何在？誰知着意弄新音，斷我鐫前今日心。當時應有曾聞者，若使重聽須淚下。

奚琴樂器本出奚人；奚，種族名，東胡種也。

哀隣家

石介

隣家不選醫，醫無救病術。朝一醫工入，暮一醫工出，有加而無瘳，皇皇不安室。吁嗟鄰翁愚，予爲病者恤。醫醫一日更千人，盲藥何能療沉疾。

石介字守道，奉符人。舉進士，慶曆中擢太子中允。篤學有志尚，樂善疾惡，遇事敢爲，魯人稱爲徂徠先生。詩嶙峋硤砢如其人。

清溪詞

孔武仲

譙門之南溪水長斜暉倒閃青銅光下與長江作支股愁霖漲天江潦黃。江潦黃，入清溪，清溪到底終無泥，還如初出秀山時。

紫髯將軍

孔平仲

華容女子哭幽囚，吉利如虎入荊州，縛其孤雛斂貔貅，長驅水步八十萬，欲獵于吳吳主憂。

羣臣勸迎同一說，拔刀斫案心膽裂；揆彼之量豈我容，開門納狼計何拙。魯家狂兒策最長，倡而和者有周郎，區區黃蓋乃乞降。龍幡遮火燒赤壁，東風急，天絳色，江中戰舸岸上營，煙焰飛騰半焚溺，雷鼓大進聲滿川，輕銳迫逐皆崩奔。紫髯將軍更歡喜，曹公座翅不得騫，子布元表何齟齬？成敗之決在一言。

君不見：甘露寶鼎間，典午受禪吳猶存；青蓋入洛雖可惜，猶勝俛首臣老賊。

紫髯將軍孫權。華容女子劉表爲荊州牧時，華容有女子忽啼呼曰：「荊州將有大喪。」縣以爲妖言，繫獄。月餘，忽於獄中哭曰：「劉荊州今日死。」華容去州數百里，卽遣馬吏驗視，而劉表果死，縣乃出之。吉利曹操一名吉利。縛其孤雛，孤雛謂劉琮也，曹操軍出荊州，至新野，荊州牧劉表子琮舉州降。長驅水步八十萬……倡而和者有周郎，曹操旣破荊州，將自江陵順江東下，遣孫權書曰：「……今治水軍八十萬衆，方與將軍會獵於吳。」長史張昭等皆主降，惟魯肅主戰；時周瑜受使自番陽歸，亦力主戰，權遂決計拒操，因拔刀斫前奏案曰：「諸將吏敢復有言當迎操者，與此案同。」黃蓋乞降，蓋周瑜部將，遣操書，詐云欲降，乃取蒙衝鬪艦十艘，載燥荻枯柴灌油，建旌旗前往，操不之疑，蓋乃發火，盡燒操船，延及岸上營，操軍潰走。子布元表子布張昭字元表之元常作文，秦松字文表。甘露寶鼎甘露魏高貴鄉公年號，寶鼎吳主孫皓年號。典午受禪，司馬氏受魏禪也；典午指司馬。

明妃曲一首

王安石

(一)

明妃初出漢宮時，淚濕春風鬢脚垂；低徊顧影無顏色，尙得君王不自持。歸來却怪丹青手，入眼平生幾曾有；意態由來畫不成，當時枉殺毛延壽。

一去心知更不歸，可憐著盡漢宮衣。寄聲欲問塞南事，只有年年鴻雁飛。家人萬里傳消息，好在氈城莫相憶。君不見咫尺長門閉阿嬌，人生失意無南北。

(二)

明妃初嫁與胡兒，氈車百兩皆胡姬；含情欲說獨無處，傳與琵琶心自知。黃金捍撥春風手，彈看飛鴻勸胡酒。漢宮侍女暗垂淚，沙上行人卻回首。

漢恩自淺胡自深，人生樂在相知心。可憐青塚已蕪沒，尙有哀絃流至今。

明妃卽王嬙，字昭君，漢元帝宮女也。時匈奴呼韓邪來朝，帝以宮女五人賜之，昭君與焉。

尙得君王不自持，呼韓邪臨辭，元帝召五女示之，昭君容貌甚美，帝見大驚，意欲留之，而難於失信。毛延壽畫工也；相傳元帝後宮甚多，不得常見，使畫工圖形，按圖召幸，諸宮人皆

路盡工，獨昭君不肯，遂不得見。後帝按圖以昭君賜匈奴，及召見，始知其美，乃案其事，毛延壽等皆棄市。阿嬌[△]漢武帝陳皇后也，以驕妒失寵，退居長門宮。青塚[△]昭君墓也，在今綏遠歸化城南三十里。

書會別亭

王安石

西城路，居人送客西歸處，年年借問去何時，今日扁舟從此去。春風吹花落高枝，飛來飛去不自知，路上行人亦如此，應有重來此處時。

和子由踏青

蘇軾

春風陌上驚微塵，遊人初樂歲華新，人閑正好路旁飲，麥短未怕遊車輪。城中居人厭城郭，喧闐曉出空四鄰，歌鼓驚山草木動，簞瓢散野鳥鳶馴。

何人聚衆稱道人？遮道賣符色怒瞋。宜蠶使汝繭如甕，宜畜使汝羊如麇。

路人未必信此語，強爲買服禳新春。道人得錢徑沽酒，醉倒自謂吾符神。

遊金山寺

蘇軾

我家江水初發源，宦遊直送江入海；聞道潮頭一丈高，天寒尙有沙痕在。中泠南畔石盤陀，古來出沒隨濤波。試登絕頂望鄉國，

江南江北青山多。羈愁畏晚尋歸楫，山僧苦留看落日；微風萬頃靴文細，斷霞半空魚尾赤。是時江月初生魄，二更月落天深黑；江心似有炬火明，飛焰照山棲鳥驚。

悵然歸臥心莫識，非鬼非人竟何物？江山如此不歸山，江神見怪驚我頑。我謝江神豈得已，有田不歸如江水。

我家江水初發源，軾蜀人故云。

中泠揚子江有中冷水，爲天下點茶第一，語見張又新水

記。

鴉種麥行

蘇軾

霜林老鴉閑無用，畦東拾麥畦西種。畦西種得青猗猗，畦東已作牛毛稀。明年麥熟芒攢槩，農夫未食鴉先啄。徐行俛仰若自矜，鼓翅跳踉上牛角。憶昔舜耕歷山鳥爲耘，如今老鴉種麥更辛勤。農夫羅拜鴉飛起，勸農使者來行水。

歷山山名，在今山東歷城縣南，亦名舜耕山，相傳舜嘗耕於此，羣鳥爲之耘。

吳中田婦歎

蘇軾

今年粳稻熟苦遲，庶見霜風來幾時。霜風來時雨如瀉，杷頭出菌鎌生衣。眼枯淚盡雨不盡，忍見黃穗臥青泥。茆苦一月壠上宿，天晴穫稻隨車歸。汗流肩頰載入市，價賤乞與如糠粃。賣牛納稅折屋炊，慮淺不及明年飢。

官今要錢不要米，西北萬里招羌兒。糞黃滿朝人更苦，不如卻作河伯婦。

龔黃漢渤海太守龔遂，潁川太守黃霸也，皆良吏。河伯婦魏文侯時，西門豹爲鄴令，鄴俗以少女投河，謂爲河伯娶婦，豹至，爲革除之。

韓幹馬十四正

蘇軾

二馬並驅攢八蹄，二馬宛頸驥尾齊，一馬任前雙舉後，一馬卻避長鳴嘶。老髯奚官騎且顧，前身作馬通馬語。後有八疋飲且行，微流赴吻若有聲；前者旣濟出林鶴，後者欲涉鶴俛啄。最後一匹馬中龍，不嘶不動尾搖風。

韓生畫馬真是馬，蘇子作詩如見畫，世無伯樂亦無韓，此詩此畫誰當看？

韓幹唐人，善畫人物，尤工鞍馬。奚官司養馬者。伯樂人名，古之善相馬者。

寓居定惠院之東，雜花滿山，有海棠一株，土人不知貴也。

蘇軾

江城地瘴蕃草木，只有名花苦幽獨。嫣然一笑竹籬間，桃李漫山總麤俗。也知造物有深意，故遣佳人在空谷。自然富貴出天姿，不待金盤薦華屋。朱唇得酒暈生臉，翠袖卷紗紅映肉。林深霧暗曉光遲，日暖風輕春睡足。雨中有淚亦悽愴，月下無人更清淑。

先生食飽無一事，散步逍遙自捫腹。不問人家與僧舍，拄杖敲門看修竹。忽逢絕艷照衰朽，歎息無言揩病目。陋邦何處得此花，無乃好事移西蜀？寸根千里不易到，銜子飛來定鴻鵠。天涯流落俱可念，爲飲一樽歌此曲；明朝酒醒還獨來，雪落紛紛那忍觸？

佳人在空谷△△△△杜甫詩：「絕代有佳人，幽居在空谷。」

書王定國所藏烟江疊嶂圖

蘇軾

江上愁心千疊山，浮空積翠如雲煙。山耶雲耶遠莫知，煙空雲散山依然。但

見兩崖蒼蒼暗絕谷，中有百道飛來泉。縈林絡石隱復見，下赴谷口爲奔川。川平山開林麓斷，小橋野店依山前。行人稍渡喬木外，漁舟一葉江吞天。

使君何從得此本？點綴毫末分清妍。不知人間何處有此境？徑欲往置二頃田。

君不見：武昌樊口幽絕處，東坡先生留五年。春風搖江天漠漠，暮雲卷雨山娟娟。丹楓翻鴉伴水宿，長松落雪驚醉眠。桃花流水在人世，武陵豈必皆神仙？江上清空我塵土，雖有去路尋無緣。還君此畫三歎息，山中故人應有招我歸來篇。

武昌樊口與黃州相對，軾嘗謫黃州。

餓者行

王令

雨雪不止泥路迂，馬倒伏地人下扶。居者不出行者止，午市不合人空衢。道中獨行乃誰子？餓者負席緣門呼。高門食飲豈無棄？願從犬馬求其餘。」耳聞

開門身就拜，拜伏不起呵羣奴，喉乾無聲哭無淚，引杖去此他何如？路旁少年無所語，歸視紙上還長吁。

送王郎

黃庭堅

酌君以蒲城桑落之酒，泛君以湘纍秋菊之英，贈君以黟川點漆之墨，送君以陽關墮淚之聲。酒澆胸中之磊隤，菊制短世之頽齡，墨以傳千古文章之印，歌以寫一家兄弟之情。

江山萬里頭俱白，骨肉十年眼終青。連牀夜語雞戒曉，書囊無底談未了。有功翰墨乃如此，何恨遠別音書少？炒沙作糜終不飽，鏤冰文章費功巧。須要心地收汗馬，孔孟行世日杲杲。

有弟有弟力持家，婦能養姑供珍鮭，兒大詩書女絲麻，公但讀書煮春茶。

王郎王純亮，庭堅妹婿。桑落酒名。湘纍謂屈原也；凡不以罪死曰纍，屈原赴湘死，故曰

湘紫。秋菊之英，屈原離騷：「夕餐秋菊之落英。」黔今安徽黔縣。黠漆言其黑也。

鏤冰新論：「畫脂鏤冰，費日損工。」汗馬言戰功也，戰馬疾馳而汗出，故云。孔孟行世。

日杲杲，杲明也，謂道義戰勝，胸中開明，乃曉然見聖賢用心處。

罔沙阻風

張耒

大江春風浪如屋，客舟迎風罔沙宿。連檣接柂古岸傍，岸頭無人春草綠。船頭日出炊烟起，買魚携菜來就市；漁人水惡不出門，蕭條野市無雞豚。隄邊紙錢灰若雨，洗酒賽神巫降語。南人艇子不避風，橫江五兩翩翩去。

北隣賣餅兒，每五鼓未旦，卽遶街呼賣。雖大寒烈風不廢，而時略不少差，因爲作詩，且有所警示。結句張耒。

城頭月落霜如雪，樓頭五更聲欲絕；捧盤出戶歌一聲，市樓東西人未行。北

風吹衣射我餅，不憂衣單憂餅冷。業無高卑志當堅，男兒有求安得閑。

△△
稻秬耒子。

早作

張耒

鷓鴣夜寒不得眠，永夜相語高樹顛；鴉鳴最早尤喧闐，啼呼相應動百千；老雞睡起足攣拳，側頭端如聞九天，引吭一唱鳴宮懸，時哉不後亦不先。朦朧初日見山川，吾廬人起有炊烟。

田家三首

張耒

(一)

野塘積水綠可染，舍南新柳齊如剪。去冬雪好麥穗長，今日雨晴初擇繭。東家饋黍西舍迎，連臂踏歌村市晚。婦騎夫荷兒扶翁，月出橋南歸路遠。

(二)

社南村酒白如餠，鄰翁宰牛鄰媪烹；插花野婦抱兒至，曳杖老翁扶背行。淋漓醉飽不知夜，裸股掣肘時灌爭。去年百金易斗粟，豐歲一飲君無輕。

(三)

新見鵲銜廷樹枝，黃口出巢今已飛。栗留啄榭桑葉老，科斗出畦新稻齊。田家苦作候時節，汲汲未免寒與飢。去來暴取獨何者？請視七月豳人詩。

七月豳人詩，詩豳風七月篇也，所詠爲農事。

福昌北秋日村行二首

張耒

(一)

秋野無人秋日白，禾黍登場秋索索。豆田黃時霜已多，桑蟲食葉留空柯。小蝶翩翩晚花紫，野鶉啄粟驚人起。洛陽西原君莫行，秋光處處傷人情。

(二)

黃桑蕭蕭新雨晴，田中日午村雞鳴。場頭九月禾黍熟，空原雉飛飽新穀。棘籬蟲鳴村路曲，路邊古墳生野菊。人稀田闊草茫茫，洛陽秋深能斷腸。

武寧道中

韓駒

小灘嘈嘈大灘惡，朝行羊腸暮鹿角；盡日拖舟不得前，忽然笮斷千尋落。上梁左側石子多，兩船與石鳴相摩。臥聽溪師倚篙哭，將如四十二灘何？

武寧卽今江西武陵縣。

羊腸鹿角上梁自注：灘名。笮船索也。

題蕃騎圖

韓駒

塞上漠漠黃雲秋，黃鬚胡兒騎紫騮；一馬攙前弄風走，胡兒掣轡空驤首。迴鞭愼莫向南馳，漢家將軍方打圍；奪弓射汝猶可脫，奪汝善馬何由歸？

田家歎

陳造

五月初四月尾，葛蒲葉長棟花紫；淮鄉農事不勝忙，日落在田見星起。前之不雨甫再旬，秧疇已欲生龜紋；近者連朝雨如注，麥隴橫雲欲殷腐；如今麥枯秧失移，舉手仰天禱其私。秧惡久晴雨害麥，兼收並得寧庶幾？餅托登盤米藏庾，農家歲寒無重糴。豈知送日戴朝星，凡幾憂晴幾憂雨？吾儕一飽信關天，下筯敢忘田家苦？

龜紋謂天旱田裂若龜紋也。庾倉之無屋者。

望夫山

陳造

亭亭碧山椒，依約疑黛立；何年蕩子婦，登此望行役？「君行斷音信，妾恨無終極，堅誠不磨滅，化作山上石。」煙悲復雲慘，髣髴見精魄；野花徒自好，江月爲誰

白？亦知江南與江北，紅樓無處無傾國，妾身爲石良不惜，君心爲石那可得？

望夫山在今安徽當塗縣西北十四里；寰宇記云：「有人往楚，累歲不還，其妻登此山，久之

乃化爲石。山椒山頂。

田家謠

陳造

麥上場，蠶出筐，此時祇有田家忙。半月天晴一夜雨，前日麥地背青秧。陰晴隨意古難得，婦後夫先各努力；條涼驟暖繭易蛾，大婦絡絲中婦織。中婦輟閑事鉛華，不比大婦能憂家，飯熟何曾趁時喫？辛苦僅得蠶事畢。小婦初嫁當少寬，令伴阿姑頑過日。明年願得如今年，剩貯二麥饒絲綿。小婦莫辭擔上肩，卻放大婦當姑前。

頑自注：頑謂嬉也。

莫飲吳江水寄陳瑩中

徐積

莫飲吳江水，胸中恐有波濤起；莫食湘江魚，令人冤憤成悲呼。湘江之竹可爲箭，吳江之水好淬劍；箭射讒夫心，劍斫讒夫面。讒夫心雖斫，胸中膽猶大；讒夫面雖破，口中舌猶在；生能爲人患，死能爲鬼害。患兮害兮將奈何？兩卮薄酒一長歌，灑向風煙付水波，遣弔胥山共汨羅！

胥山△山名，伍子胥死，吳人爲立祠江上，命曰胥山。

汨羅△江名，在今湖南湘陰縣北，西流入

湘，屈原懷沙，自沉於此。

哀哀詞

徐積

哀哀復哀哀！哀哀至此極！孤兒與慈母，中路忽相失；恍惚須臾間，終日不復得。誰復坐我堂？誰復入我室？誰復飲兒酒？誰復哺兒食？兒飢復誰念？兒寒復誰恤？

耳不聞慈語，目不見慈色，譬如行路人，日遠如一日；行人猶可期，遠道猶可追，天窮地盡處，一日猶可歸，哀哀復哀哀！此去無盡時！誰言生離別，不如死別離？君不見：人已閉門鳥已棲，黃昏塚畔孤兒啼。

古別離

陳與義

東門柳，年年歲歲征人手，千人萬人於此別，柳亦能堪幾人折？願君遄歸與君期，要及此柳未衰時。

送王周士赴發運司屬官

陳與義

寧食三斗塵，有手不揖無詩人；寧飲三斗醋，有耳不聽無味句。墻東草深蘭發薰，君先夢我我夢君。小窗誦詩燈花喜，窗外北風怒未已。書生得句勝得官，風其少止盡人歡！五更月暈一千丈，明日君當泛淮浪；去去三十六策中，第一買酒。

塞北風。

鄧州城樓

陳與義

鄧州城樓高百尺，楚岫秦雲不相隔。
傍城積水晚更明，照見綸巾倚樓客。
李
白上天不可呼，陰晴變化還須臾。
獨撫危欄詠奇句，滿樓風月不枝梧。

觀江漲

陳與義

漲江臨眺足消憂，倚杖江邊地欲浮。
疊浪併翻孤日去，兩津橫卷半天流。
鼉
鼉雜怒爭新穴，鷗鷺驚飛失故洲。
可爲一官妨快意，眼中唯覺欠扁舟。

再登岳陽樓感賦詩

陳與義

岳陽壯觀天下傳，樓陰背日隄綿綿。
草木相連南服內，江湖異態闌干前。
乾

坤萬事集雙餐，臣子一謫今五年。欲題文字弔古昔，風壯浪湧心茫然。

南服猶言南方也。

武興歌

唐庚

去年山中無黍稷，只有薤根並橡實。薤根作麪如食蜜，橡實炊飯如剝栗。東家有錢食橡實，西家無錢惟食薤。今年薤盡橡實貴，山中人作寒蟬枯。

劍州道中見桃李盛開而梅花猶有存者

唐庚

桃花能紅李能白，春深何處無顏色？不應尚有數枝梅，可是東君苦留客？向來開處當嚴冬，桃李未在交遊中。卽今已是丈人行，肯與年少爭春風？

唐庚字子西，丹稜人。紹聖進士，爲宗子博士，終承議郎。爲文精密，詩亦結束精悍。丈人行

謂尊長也。

遊東塔雨中夜歸

孫覲

山色凌寒春尙瘦，潭影涵空清可漱。漠漠雲行紫翠間，班班雨濕黃昏後。火炬穿林鳥出巢，人語闌門狗窺竇。杖藜有興會重來，更待黃鸝啼晴晝。

睥鳥吟。

罨畫谿行四首（錄二）

（一）

老牯浮鼻水中歸，綵雉應媒桑下飛。蘿蔦冥冥山四起，數家雞犬煙樹裏。一支新綠漲晴溝，楊柳中間繫小舟。罨畫谿頭鳥鳥樂，呼風喚雨不能休。

（二）

蝶趁花飛爭入坐，倚空百尺游絲墮。亂山銜日半船明，斷雲載雨前村過。巖

芽載土小兒拳，漁市人歸柳貫鮮。
罨畫谿頭人語好，烹魚煮蕨餉春田。

清江行

劉子翬

漁翁一棹老清波，稚子學語能漁歌。
日暮沙頭寒蕪竹，雨餘船角亂堆蓑。
罨畫小鮮仍自餽，湖海茫茫醉鄉內。
夜闌酒渴漱寒流，月照蘆花上篷背。

^{△△}小鮮魚也；
[△]老子：「治大國若烹小鮮。」

夜半聞橫笛

程俱

秋風夜攪浮雲起，幽夢歸來度寒水。
一聲橫玉靜穿雲，響振疎林葉空委。
曲終時引斷腸聲，中有千秋萬古情。
金谷草生無限思，樓邊斜月爲誰明？

樂神曲

范成大

豚蹄滿盤酒滿杯，清風瑟瑟神欲來。願神好來復好去，男兒拜迎女兒舞，老翁翻香笑且言：「今年田家勝去年，去年解衣折租價，今年有衣著祭社。」

繰絲行

范成大

小麥青青大麥黃，原頭日出天色涼。姑婦相呼有忙事，舍後煮繭門前香。繰車嘈嘈似風雨，繭厚絲長無斷縷。今年那暇織絹著，明日西門賣絲去。

催租行

范成大

輸租得鈔官更催，踉蹌里正敲門來。手持文書雜嗔喜：「我亦來營醉歸爾。」牀頭慳囊大如拳，撲破正有三百錢。「不堪與君成一醉，聊復償君草鞋費。」

後催租行

范成大

老父田荒秋雨裏，舊時高岸今江水。傭耕猶自抱長飢，的知無力輸租米。自從鄉官新上來，黃紙放盡白紙催。賣衣得錢都納卻，病骨雖寒聊免縛。

去年衣盡到家口，大女臨岐兩分首。今年次女已行媒，亦復驅將換升斗。室中更有第三女，明年不怕催租苦。

祭竈詞

范成大

古傳臘月二十四，竈君朝天欲言事。雲車風馬少留連，家有杯盤豐典祀。猪首爛熟雙魚鮮，豆砂甘鬆粉餅圓。男兒酌獻女兒避，酹酒燒錢竈君喜。

「婢子鬪爭君莫聞，猫狗觸穢君莫嗔。送君醉飽歸天門，杓長杓短勿復云，乞取利市歸來分。」

長歌行

陸游

人生不作安期生，醉入東海騎長鯨，猶當出作李西平，手梟逆賊清舊京。金印煌煌未入手，白髮種種來無情。成都古寺臥秋晚，落日偏傍僧窗明。豈其馬上破賊手，哦詩常作寒蜚鳴？

興來買盡市橋酒，大車磊落堆長餅，哀絲豪竹助劇飲，如鉅野受黃河傾，平時一滴不入口，意氣頓使千人驚。

國讎未復壯士老，匣中寶劍夜有聲。何當凱還宴將士，三更雪壓飛狐城？

安期生古有仙人名安期生。

李西平唐李晟拜鳳翔隴右涇原節度使，兼行營副元帥，徙

王西平郡，實封千五百戶。

鉅野澤名，元末爲黃河所決，遂涸，在山東鉅野縣北。

飛狐亦

作蜚狐，嶺名，今曰黑石，在河北涑源縣北，跨蔚縣界；史記鄭生傳所謂：「距蜚狐之口，」卽其地。

題醉中所作草書卷後

陸游

胸中磊落藏五兵，欲試無路空崢嶸。酒爲旗鼓筆刀槊，勢從天落銀河傾。端溪石池濃作墨，燭光相射飛縱橫。須臾收卷復把酒，如見萬里煙塵清。丈夫身要在有立，逆胡運盡行當平。何時夜出五原塞，不聞人語聞鞭聲？

五兵，戈、矛、戟、盾、矢，謂之五兵。

端溪，溪名，在今廣東高要縣，產硯石，世稱端硯。

五原

漢郡名，今五原縣。

松驥行

陸游

驥行千里亦何得？垂首伏櫪終自傷。松閱千年棄澗壑，不如殺身扶明堂。士生抱材願少試，誓取燕趙歸君王。閉門高臥身欲老，聞雞相蹴涕數行。正令伊嚶死牀簀，豈若橫身當戰場？半酣浩歌聲激烈，車輪百轉盤愁腸。

伏櫪，魏武帝《短歌》：「老驥伏櫪，志在千里。」

聞雞相蹴，晉祖逖中夜聞雞鳴，蹴劉琨覺，曰：

「此惡聲也！」因起舞。簀，牀版也。

出塞曲

陸游

佩刀一刺山爲開，壯士大呼城爲摧；三軍甲馬不知數，但見動地銀山來。長戈逐虎祁連北，馬前曳來血丹臆；却回射雁鴨綠江，箭飛雁起連雲黑。清泉茂草下程時，野帳牛酒爭淋漓。不學京都貴公子，唾壺麈尾事兒嬉。

祁連祁連山，卽天山。

唾壺承唾之器；晉王敦酒後以如意擊唾壺爲節，詠魏武樂府「老

驥伏櫪，志在千里……」

麈尾拂塵；晉王衍善玄言，喜談老莊，談時每執玉柄麈尾。

大雪歌

陸游

長安城中三日雪，潼關道上行人絕；黃河鐵牛僵不動，承露金盤凍將折。虬鬚豪客狐白裘，夜來醉眠寶釵樓；五更未醒已上馬，衝雪卻在南山遊。

千年老虎獵不得，一箭橫穿雪皆赤，擎空爭死作雷吼，震動山林裂崖石。曳

歸擁路千人觀，鬪體作枕皮蒙鞍。人間壯士有如此，胡不來歸漢天子？

鐵牛^{△△}中華古今注：「陝州有鐵牛廟，牛頭在河南，尾在河北，以鎮河患。」

大風登城

陸游

風從北來不可當，街中橫笛人馬僵。西家女兒午未粧，帳底爐紅愁下牀；東家喚客宴畫堂，兩行玉指調絲簧，錦繡四合如垣牆，微風不動金猊香。我欲登城望大荒，勇欲爲國平河湟；才疎志大不自量，西家東家笑我狂。

金猊^{△△}香爐也，以塗金爲狻猊狀。河湟^{△△}，河，黃河，湟，亦水名。

舟中對月

陸游

百壺載酒遊凌雲，醉中揮袖別故人，依依向我不忍別，誰似峨眉半輪月？月
窺船窗挂淒冷，欲到渝州酒初醒。江空裊裊釣絲風，人靜翩翩葛巾影；哦詩不睡

月滿船，清寒入骨我欲仙。人間更漏不到處，時有沙禽背船去。

渝州州名，今四川巴縣治。

弋陽道中遇大雪

陸游

我行江郊暮猶進，大雪塞空迷遠近。壯哉組練從天來，人間有此堂堂陣。
少年頗愛軍中樂，跌宕不耐微官縛。憑鞍寓目一悵然，思爲君王掃河洛。夜
聽簌簌窗紙鳴，恰似鐵馬相磨聲。起傾斗酒歌出塞，彈壓胸中十萬兵。

組練唐張說詩：「日華光組練。」

五月十四日夜夢一僧持詩編過予有暴雨詩語頗壯予欣然和之聯巨軸欲書未落筆而覺追作此篇

陸游

黑雲塞空萬馬屯，轉盼白雨如傾盆。狂風疾雷撼乾坤，壯哉澗壑相吐吞！老

龍騰拏下天閭，鱗間火作電脚奔。巨松拔起千年根，浮槎斷梗何足論？我詩欲成醉墨翻，安得此雨洗中原？長河袞袞來崑崙，鶴鵲下看黃流渾。

焉耆行二首（錄一）

陸游

焉耆山頭暮煙紫，牛羊聲斷行人止；平沙風急捲寒蓬，天似穹廬月如水。大胡太息小胡悲，投鞍欲眠且復起。漢家詔用李輕車，萬丈戰雲來壓壘。

焉耆山名，在焉耆國；焉耆國漢西域國名，今新疆焉耆縣。

穹廬，氈帳也。李輕車，漢李

廣從弟蔡爲輕車將軍。

隴頭水

陸游

隴頭十月天雨霜，壯士夜枕綠沉槍，臥聞隴水思故鄉，三更起坐淚數行。我語壯士勉自強，男兒墮地志四方，裹尸馬革固其常，豈若婦女不下堂？生逢和親

最可傷，歲輦金絮輸胡羌。夜視太白收光芒，報國欲死無戰場。

綠沉槍杜甫詩：「雨拋金鎖甲，苔臥綠沉槍。」

夜聞姑惡

陸游

湖橋東西斜，明月高城漏鼓傳三更。釣船夜過掠沙際，蒲葦蕭蕭姑惡聲。湖橋南北煙雨昏，兩岸人家早閉門。不知姑惡何所恨？時一聲能斷魂。天地大矣汝至微，滄波本自無危機。秋菰有米亦可飽，哀哀如此將安歸？

插秧歌

楊萬里

田夫拋秧田婦接，小兒拔秧大兒插。笠是兜鍪篲是甲，雨從頭上濕到胛。喚渠朝餐歇半霎，低頭折腰只不答。秧根未牢蔕未匝，照管鵝兒與雛鴨。

兜鍪首鑑。

平望夜景

楊萬里

三鑿鑿，三當當，夜泊平望更點長；
新月無光湖有光，昨宵一雪今霄霜，犬吠
兩岸歸人忙。夜深人靜無一事，
畫燭注殘人欲睡，忽有漁船外水來，
一棹波聲風雨至。半生墮在紅塵中，
浮家東吳東復東，樓船夜宿琉璃國，
誰言別有水晶宮？

平望地名，卽今江蘇吳江縣之平望鎮，爲河湖匯聚之所，西通太湖，南通浙江。

分題得漁村晚照

徐照

漁師得魚繞溪賣，小船橫繫柴門外，
出門老嫗喚雞犬，收斂簑衣屋頭曬。
賣魚得酒又得錢，歸來醉到地上眠；
小兒啾啾問煮米，白鷗飛去蘆花烟。

軍中樂

劉克莊

行營面面設刁斗，帳門深深萬人守；將軍貴重不據鞍，夜夜發兵防隘口。自言鹵畏不敢犯，射麋捕鹿來行酒。更闌酒醒山月落，綠縑百段支女樂；誰知營中血戰人，無錢得合金瘡藥？

鹵與麋通。

題申季山所藏李白時畫村田樂圖

戴復古

春秧夏苗秋遂穫，官賦私逋都了卻。雞豚社酒賽豐年，醉唱村歌舞村樂。鼓笛有聲無曲譜，布衫顛倒傴僂舞。欲識太平真氣象，試看此畫有佳趣。

管絃聲按宮商發，細轉柳腰花十八。羅幃繡幙拂香風，九醞葡萄金盞滑。王孫公子巧歡娛，勿將富貴笑田夫。非渠耕稼飽君腹，問有黃金可樂無？

織婦歎

戴復古

春蠶成絲復成絹，養得下蠶重剝繭，絹未脫軸擬輸官，絲未落車圖贖典。一
春一夏爲蠶忙，織婦布衣仍布裳；有布得著猶自可，今年無麻愁殺我！

採桑曲

鄭震

晴採桑，雨採桑，田頭陌上家家忙。去年養蠶十分熟，蠶姑只著麻衣裳。

鄭震字叔起，號菊山，連江人。嘗長安定和靖書院。淳祐時，鄭清之再相，震登其門，厲聲謂其
前已誤國，不堪再相，遂被執，下獄，鄭罷相乃免。

過平原原作

文天祥

平原太守顏真卿，長安天子不知名，一朝漁陽動鼙鼓，大江以北無堅城。公
家兄弟奮歌起，一十七郡連夏盟，賊聞失色分兵還，不敢長驅入咸京。明皇父子
將西狩，由是靈武起義兵，唐家再造李郭力，若論牽制公威靈。

哀哉常山慘鉤舌，心歸朝廷氣不攝。崎嶇坎坷不得志，出入四朝老忠節。當年幸脫安祿山，白首竟陷李希烈。希烈安能遽殺公？宰相盧杞欺日月。亂臣賊子歸何處？茫茫烟罩中原土。公死於今六百年，忠精赫赫雷當天。

顏真卿^{△△}唐人，爲平原太守，安祿山反，與從父兄杲卿等起兵討賊，河朔諸郡共推爲盟主，亂平，遷刑部尚書，封魯國公。德宗時，盧杞惡之，會李希烈反，杞建言遣真卿往諭，希烈脅之，持節不屈，卒遇害。常山慘鉤舌，常山即常山太守顏杲卿，鉤舌事，注見前。

